



5. marts 2010

UPA 2010/47

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Qimmit aalajangersimasut, avatangiisiminnut ulorianarsinnaasut nalilerneqartut eqqunneqartarnerisa kinguaassiorsinnaanerisalu inerteqqutineqarnissaat kiisalu qimmit taakku qimminik assiginngisaminnik ernioqateqarsinnaanerisa pinaveersimatinnissaat anguniarlugu Naalakkersuisut suliniuteqarnissamut peqquneqarnissaannut Inatsisartuni aalajangiiffigisassatut siunnersuut.

(Inatsisartunut ilaasorta q Justus Hansen, Demokraatit)

Tungavilersuut:

Demokraatini isumaqartuarpugut pinaveersaartitsineq aqqutissaasoq. Isumaqarpugut, pingaaruteqartoq ajornartorsiutinngorsinnaasut siulittornissaat iliuseqarfialugillu, ajornartorsiut pinngortinnagu.

Demokraatini qimmit qaasussakkat aamma suannarsakkat inuiaqatigiit toqqissillutik inuunissaannut ulorianartutut isigaagut, taamaattumik isumaqarpugut Naalakkersuisut piaartumik isumagisariaqaraat, qimminut taamaattunut innuttaasut – minnerunngitsumik meeqqat – illersorneqarnissaat.

Demokraatini ilisimavagut peqqussutit pioreersut ullumilu atuuttut qimmit qimuttut kiisalu qimmeqarnissaq qitsuuteqarnissarlu pillugit Inatsisartut Inatsisaanni nr. 18 30. Oktober 1998 – meersumi aqqutigalugu. Tassani iluarisimaarlugu maluginiarparput Kalaallit Nunaanni inatsitigut piumasaqaataasoq, qimmit ukiup affaa sinnerlugu utoqqaassusillit pitoqqassasut, mattunneqaqqassasut, ungaluusani mattunneqaqqassasut imaluunniit PITUUTALERUGIT ANGALLANNEQARTASSASUT. Peqqussut tamanna Danmarkimi peqqussutinut atuuttunut naleqqiullugu sukanganeruvoq, Danmarkimi qimmit pituutaqartariaqanngimmata naalatsissinnaagaanni. Aamma iluaraarput, qimmit inunnik saassussisimasut imaluunniit uumasogatiminnik uiartuisimasut, ERNGIINNAQ toqunneqartassammata. Danmarkimi tamanna periarfissaavoq, piumasaqaataanani.

Immikkoortumili ataatsimi Danmarkimi peqqussutit atuuttut kalaallit nunaanni peqqussutinut atuuttunut naleqqiullugit sukanganerupput. Danmarkimi qimmit aalajangersimasut marluk eqquteqqusaanngillat ernioqateqqusaanatillu: Pitt bull terrier aamma Tosa. Qimmit taakku aamma qimminik allanik ernioqateqaqqusaanngillat.

Piffissap ilaani Danmarkimi oqallisigineqarpoq inerteqquteqarnermut qimmit allat qaasussakkat suannarsakkallu ilanngunneqassannginnersut pillugu. Inatsisinik atortitsinermut ministereqarfik tamatumunnga atatillugu ataatsimiititaliamik pilersitsivoq, danskit qimmit pillugit inatsisaannik qimerluueqqissaartussamik siunertaralugu inatsisip sutigut sukaterneqarsinnaanerata misissornissaa. Piffissami siunnersuutip matuma saqqumminnerata nalaani ataatsimiititaliap isumaliutissiissutissaa suli saqqummiunneqanngilaq.



Ataatsimiititaliali qimmit ulorianartut pillugit iliuuserineqartussanik eqqarsarnertik naammassereerpaa. Iliuusissatut eqqarsaatigineqartut marluupput: inerteqquteqarnissaq aamma qasunganeqarsarfik peqqussusiornissaq.

Inerteqquteqarnissamik eqqarsarnermit qimmit assigiinngitsut aqqaneq-marluk allat eqquneqarsinnaajunnaarnissaat erniorteqqissinnaajunnaarnissaallu eqqarsaatigineqarpoq.

Ernioqqusinnginneq anguniarneqarpoq qimminik kinguaassiorsinnaajunnaartitsinikkut. Ikaarsaariarnermi, piffissami qimmit pineqartut Danmarkimi suli pigineqarfissaanni, piumasarineqarpoq pituutserlugit angallanneqartassasut aamma issaruteqartillugit angallanneqartassasut.

Aamma taamaassaaq qasunganeqarsarfik peqqussusiortoqarpat, qimminilli pineqartunik assigiinngitsunik aqqaneq-marlunnik eqqussisoqarsinnaajuassaaq. Ataatsimiititaliami ilaasortat periutsip sorliup toqqarnissaa pillugu aveqqapput. Folketingimili partiit nalunaarutigeriigaat naapertorlugit ilimanarpoq inerteqquteqalernissaq aalajangiunneqarumaartoq.

Demokraatini isumaqarpugut, qimmit Pitt bull-it Tosallu eqqarsaatigalugit Danmarkimisulli Kalaallit Nunaanni inerteqquteqalerutta naapertuutissasoq aammalu inerteqquteqarnermi qimmit assigiinngitsut aqqaneq-marluk ilanngunneqartariaqartut, qimmit pillugit ataatsimiititaliap innersuussuteqarneratulli.

Tamanna atuutissaaq Kalallit Nunaanni qimmit taakku pigineqartut pigineqanngikkaluarpataluunniit, aammalu assersuutissaaqassagaluarpalluunniit ilumut qimmit taakku allanik saassussimasut. Matumani pineqarput qimmit maannga nunamut naleqquttuunngitsut ulorianartullu. Pigineqassappata ulorianarput, maanilu nunami najugallit arlaannaalluunniit ulorianartorsiortinneqarnissaat pisariaqanngilaq – sualummik qitornagut.

Qimmit pillugit Ataatsimiititaliap eqqarsaatai utaqqinikuuagut. Taakkulu maanna tiguneqarsimalerput. Qimmit inerteqqutaareersut saniatigut allat aqqaneq-marluk immikkut ulorianartutut isigineqarput. Ima ulorianartigaat, danmarkimi inerteqqutaalernissaasa ukiup matumap ingerlanerani pinissaa naatsorsuutigineqarsinnaalluni. Assiganik inuiaqatigut illersussallugit pissutissaaqarpugut.

Taamatut oqarluta Naalakkersuisut akissuteqarnissaat kiisalu partiit allat saqqummiussassaat qilanaarluta utaqqissavagut.



ILANNGUSSAQ:

- Fila brasileiro
- Dogo argentino
- Amerikansk staffordshire terrier
- Boerboel
- Kangal
- Centralasiatisk ovtcharka
- Kaukasisk ovtcharka
- Sydrussisk ovtcharka
- Tornjak
- Sarplaninac
- Staffordshire bull terrier
- Amerikansk bulldog